

Edizioni

- letto 397 volte

Toja

I.

En cest sonet coind'e leri
fauc motz e capuig e doli,
que serant verai e cert
qan n'aurai passat la lima;
q'Amors marves plan'e daura
mon chantar, que de liei mou
qui pretz manten e governa.

II.

Tot iorn meillur et esmeri
car la gensor serv e coli
el mon, so-us dic en apert.
Sieus sui del pe tro q'en cima,
e si tot venta·ill freid'aura,
l'amors q'inz el cor mi plou
mi ten chaut on plus iverna.

III.

Mil messas n'aug e-n proferi
e-n art lum de cer? e d'oli
que Dieus m'en don bon issert
de lieis on no-m val escrima;
e qan remir sa crin saura
e-l cors q'es grailet e nou
mais l'am que qi-m des Luserna.

IV.

Tant l'am de cor e la queri
c'ab trop voler cug la-m toli
s'om ren per ben amar pert.
Q'el sieus cor sobretracima
lo mieu tot e non s'eisaura;
tant a de ver fait renou
c'obrador n'a e taverna.

V.

No vuoill de Roma l'emperi
ni c'om m'en fassa apostoli,
q'en lieis non aia revert
per cui m'art lo cors e-m rima;
e si-l maltraich no-m restaura
ab un baiser anz d'annou
mi auçi e si enferna.

VI.

Ges pel maltraich q'ieu soferi
de ben amar no-m destoli,
si tot me ten en desert,
c'aissi-n fatz los motz en rima.
Pieitz trac aman c'om que laura,
c'anc plus non amet un ou
cel de Moncli n'Audierna.

VII.

Ieu sui Arnautz q'amas l'aura,
e chatz la lebre ab lo bou
e nadi contra suberna.

- letto 283 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-169>